



Lara Gut, la victura dal classament general dal Cup da skis mundial.



Han gudagnà la culla per la cumbinaziun: Alexis Pinturault e Wendy Holdener.

# «Memia blers daners è tut auter che saun»

San Murrezzan: Final Cup da skis mundial

DA GION NUTEGN STGIER / ANR

■ Ina culissa dad aur, prestaziuns da vaglia dal team svizzer ed ina organizaziun perfetga han fatg daventar l'occurrèza in vair eveniment da sport. La basa per ina realisaziun optimala dal Campiunadi mundial da skis 2017 a San Murrezzan è avant maun er grazia a Hugo Wetzel, il president dal comité d'organisaziun. Il favrer 2017 segna San Murrezzan gia per la 5avla giada per l'organisaziun dal Campiunadi mundial da skis. Quella occurrèza duai daventar ina aventura da sport sco tut ils blers events da sport che han lieu onn per onn a San Murrezzan. Quai ha adina puspè ditg Hugo Wetzel, il president dal comité d'organisaziun dal Campiunadi mundial da skis 2017 a chaschun da noss discurs a Salastrains. «Nus avain en vair senn in paradìs per manar tras las cursas e lura a Salastrains er la pi bella arrivada da tut las cursas da skis», menziuna Wetzel, el che viva dapi onns per il sport e per il turissem. El è in um cun ina gronda rait da contacts, ina persuna che realisescha sias visiuns, in president avert ed in uman cun in carisma particular. Wetzel è lura er la «locomotiva» sch'i va per organisar a San Murrezzan occurrèzas da skis e tuttina lauda el adina puspè er bleras autras persunas che hajan gronds marts per la realisaziun da las cursas internaziunalas a San Murrezzan. Ina da quellas saja per exempel Martin Berthod, el che segna per la direzzion dal resort cursas.

### Losch da las forzas giuvnas

Er ils davos dis saja sa verificà che cun in comité d'organisaziun cun ina gronda

experientscha saja bain pli simpel da realisar ina occurrèza sco il final dal Cup mundial da skis. La collavuraziun tranter ils commembers e las commembras dal comité d'organisaziun saja fitg amiaivla e tuttina manca betg tar mintgin il respect duai. Wetzel lauda cunzunt la tenuta da tuts ed anc pli fitg lauda el il sa cuntgnair da sias forzas giuvnas en il comité d'organisaziun cun 20 persunas. Crudà en egl saja cunzunt che er en situaziuns pli criticas mantegnian tuts la ruasaviladad e quai saja da gronda impurtanza en in tal gremi. Quellas forzas giuvnas sajan er l'avegnir e perquai haja el integrà ellas cun plaschair en il comité d'organisaziun dal final dal Cup mundial da skis e dal Campiunadi mundial da skis 2017. Gia ils davos dis haja el raccoltà ils emprims fritgs da la buna lavur da las persunas che vegnian en pauc onns a realisar las cursas da skis internaziunalas a San Murrezzan, menziuna Wetzel.

### La Svizra dovra grondas occurrèzas da sport

Gist da preschent nua ch'il turissem svizzer saja en in gronda crisa dovria la Svizra urgent gronds events da sport. Mintga occurrèza da sport che haja lieu a San Murrezzan e conturn atiria in grond public, portia turisticamain ed economicamain fitg bler a la regiun. «Nus avain da mussar a l'entir mund che er la Svizra è abla d'organisar grondas occurrèzas da sport», menziuna Wetzel. Il final dal Cup mundial da skis saja en tuts cas stà la platfurma ideala per mussar a l'entira Svizra, dentant er a l'exteriur, da vegnir a San Murrezzan. Wetzel sustegna er ferm il project gieu olimpics 2026 en Svizra.

«Nus na dastgain sa lubir da distanziar las regiuns da las Alps adina pli fitg da las occurrèzas da sport d'enviern», punctuescha il president dal comité d'organisaziun dal Campiunadi mundial da skis 2017 a San Murrezzan. Il pli grond privel saja che en pajais sco la Russia, la China e la Corea saja avant maun blers daners e quai saja tut auter che saun. En quella chausa hajan las federaziuns da sport, dentant er la politica, dad ir sur ils cudeschs. Per l'organisaziun e realisaziun da las occurrèzas da sport segnian ils lieus ed ils comités d'organisaziun, dentant per l'infrastructura saja la politica responsabla.

### Buna reclama

Wetzel ha ditg ch'il comité d'organisaziun haja sut controlla il budget da vers 65 000 francs per il Campiunadi mundial da skis en 11 mais a San Murrezzan. Intschert saj lura la vendita dals tickets che saja adina grev da budgetar. El saja però da buna speranza che suenten ils success dals skiunzs e da las skiunzas da Swiss Ski sco er dapi l'atmosfera geniala dals davos dis s'augmentia l'interess ferm per ils bigliets dal Campiunadi mundial da skis 2017 che ha lieu a San Murrezzan dals 6 fin ils 19 da favrer. Anc avain nus betg tuts dals 1300 voluntaris, dentant ils 500 voluntaris fidaivels ch'èn dapi intgins onns adina sin il post, quels animeschan er auters da vegnir il proxim favrer a San Murrezzan. La prova generala per il Campiunadi mundial da skis 2017, quella saja gartegiada, er sche per mintga cursa cumpiglia almain 100 000 detagls pli gronds ubain pli pitschens, concluda Wetzel.



La legenda da skis Bernhard Russi (a san.) cun il skiunz Reto Schmidiger, omadus da la Svizra centrala.



Il president da Swiss Ski, Urs Lehmann, en discurs cun la schurnalista grischuna Riccarda Trepp.



Dus uffants cun ina da las cullas dal Cup da skis mundial.

FOTOS G. N. STGIER



Da la partida a l'occurrèza a San Murrezzan era Gian Franco Kasper, il president da la FIS.